

Tito

Pablo Titore gojabeopu

1 ¹Yũhũ Pablo mũre Titore gojaa. Goãmũ pohro majagu, Jesucristo yare ãgu buhedore ãgu apidigu ahraa. Goãmũ ãgu beyenirã Jesure erã umupeoburire, òari buherire erã masiburire Jesu buhedoregu yare apimi. Iri buheri Goãmũ ãgu dorediro dopa ta mari iiburire werea. ²Eropigu áripehrerinũri Goãmũ yarã umarogue erã òaro áriniguiboro sãre buhea erãre. Goãmũ ne guyari marigu i yebare ãgu ihacũnuguboro core “Yũ pohrogue eropa òaro áriniguicãrãcoma,” arĩ apipu marire. ³Eropigu ãgu queoranũ áricũ ãgu eropa arĩ apirare masidoredigu árimi masare. Eropa ta masidoregu yare erãre weredoremi ãgu marire taugu. ⁴Mũre Jesu yare buhebũ. Yũ eropa buhecũ peegu, Jesure umupeonũgabũ mũhũ yũ umupeoro dopa. Eropigu mũhũ yũ buhedigu árigũ diaye ta yũ magũ iro dopa árigũ ta iiaa. Mũre ire gojabeogu iiaa. Eropigu Goãmũ mari Pagũ, Jesucristo marire taugu itamuri mera mũre òadorea. ãgu itamuri mera òaro árique mũhũ.

Creta waĩcũri nũgũro majarãre Tito ãgu wereburire werepu Pablo

⁵Creta waĩcũri nũgũro yũ mũre apicũ Jesu yarã erã buheboro duhyanibũ irisubure. Eropigu erã iiburire werebure apibũ yũhũ mũre. Eropigu macari nũcũ majarã Jesu yarã oparã árimorãre beyedoregu apibũ mũre. ⁶⁻⁸Erã oparã Goãmũ pohro majarã ahrima. Eropigu erãre beyegu òarãre beyeque gajiropa iibirãre. Eropigu yujugo ta marapocũrã árirãre beyeque. Eropigu “Bu árigũ ahraa yũhũ,” arĩ pepirãre beyeque. Eropigu mata guabirãre, merebirãre, masa mera gamequeãbirãre, niyerure gamebirãre beyeque. Eropa beyegu erã ya wihire ñajarãre òaro ihadiburãre, òaripũre suarãre, pee masirãre, òaripũre iiniguirãre, ñeri marirãre, erã ñaribejarire iibirãre, tebori mariro mohmerãre, òarire iiniguirãre beyeque. Eropirã mũa beyerã porãre òpa áriro gahmea. Jesure umupeorã, òarire iiniguirã, áripehrerãre òaro yũhrirã áriro gahmea oparã porãre. ⁹⁻¹⁰Eropirã òari buherire queoro mari buhediro dopa ta ne duhubirã áriporo oparã mũ beyenirã. Eropirã òari buherire wererã árirãcoma. Eropa iirã òari buherire gamebirãre buherã erã ya guyari áricũ masicũ iirãcoma erã. Eropigu òaro beyeque Jesu yarã weca oparã áripehrerãre.

Bajarã erã oparãre tarinũgarã, õaro pepi wereniguibirã, gũyarã àhrima dohpaguere. Eropa iirã yujurãyeri Moise dorerire iidorerã tamera ñetariaro iirã iima. Erã buheri iri diaye áribiricũ erãre masicũ iiro gahmea. ¹¹Erã Moise dorerire iidorerãpũ gũyarire buherã niyerure wajatadiarã buhema. Eropa buherã yujuyeri wiri majarãre áripehrerãre Goãmũ yapũre cõãcũ iirã iicoma erã. Erã eropa iicũ erãre iidorebiricãro gahmea.

¹²Iribojegue weredigũ Creta majagũ áriqueregũ ta õpa arĩ werepũ: “Creta nũgũro majarã eropa gũyaniguirã waicũma. Ñerire iirã diayea iro dopa iirã àhrima. Eropirã pagari barã árirã ne mohmediabeama,” arĩpũ ãgũ ãgũ ya nũgũro majarãre. ¹³Ãgũ eropa arĩra diaye ta àhraa. Erã eropa áricũ ãagũ erãre turaro wereque Jesu ya buheripũre erã õaro pee masiboro dopa. ¹⁴Eropigũ “Judio masa iribojegue majarã erã arĩ bocarare peebiricãque,” arĩ wereque erãre. Jesu yare gamebirã erã doreri sãre Creta majarã erã peenũrubiriborore wereque erãre.

¹⁵Õpa àhraa. Dipuwaja marirã õari dihtare pepima. Ñerire iiniguirãpũ ñeri dihtare pepima. Erã pepirĩpũ ñetaria. Eropirã õaripũre beyemasibeama. ¹⁶Erã “Goãmũre masia gũa,” arĩquererã ta ñerire iima. Eropa iinirã erã áricũ ãarã Goãmũre masibirã erã áricũ masia mari. Eropirã erã ñetariarã, Goãmũ yare tarinũgarã àhrima. Eropirã õarire iimasibeama.

Õari buherire weredorepũ Pablo Titore

2 ¹Mũpũ buhegũ õari buheri arĩdiro dopa ta õaro buheque. ²Mũrãpũre õpa wereque: “Mũa gũhyadiarã, masa erã umupeorã, pee masirã, ‘Goãmũ diaye iigũ àhrimi,’ arĩ umupeorã, õari buherire õaro iirã, Jesure masa sãre mahirã, ñero tariquererã ta yujuro bojerã árique,” arĩ wereque erãre. ³Mũrã nome sãre eropa ta arĩ wereque: “Gũhyadiarã nome, ñeri quere werewuabirã nome, merebirã nome árique,” arĩ wereque erã nome sãre. Eropirã erã nome õarire gajirãre buheporo. ⁴Eropa iirã õpa arĩ buheporo mũrã nome nómeñaripũre: “Mũa marapũ sũmarãre mũa porã sãre mahique,” arĩ buheporo. ⁵“Eropirã mũa pee masirã nome, gajirã mũa mera ñero iibirã nome, mũa ya wihĩ majare õaro ãhadiburã nome, õaro iirã nome, mũa marapũ sũmarãre õaro yũhrirã nome árique,” arĩ buheporo mũrã nome nómeñaripũre. Erã eropiicũ ãarã gajirãpũ “Goãmũ yare umupeorã ñero iirã àhrima,” arĩmasibeama mũare.

⁶Eropigũ mamarã sãre õpa wereque: Pee masirã áriporo erã. ⁷Eropigũ mũpũ õari dihtare iiniguicãque mũre erã ãhacũburire. Buhegũ ne gũyaro mariro buheque. Eropa buhegũ gũhyadiaro mera buheque mũhũ. ⁸Eropa buhegũ õaro pee masiri mera buheque ne gajirã mũre erã weresãmasibiriburire. Mũ eropa buhecũ ãarã marire ãhaturirã áriquererã ta marire bu gohra ta werewuamasibeama. Marire eropa werewuamaacãrã gũhyasiũro warãcoma erã.

⁹Eropigũ pohro majarãre õpa doreque: Erã oparãre õaro yũhrirã áriporo. Eropirã erã oparãre õaro mucubiricũ iiporo. Eropa dihta iiporo. Eropirã erã

oparãre pũriro mera yũhribiricãporo. ¹⁰Eropirã erã oparã yare yajabiricãporo. Eropirã òarã erã oparã dorerire òaro iinigucãrã áriporo. Erã eropa òaro yũhriã áricũ iarã Goãmũ marire taugũ igũ buherire pee suarãcoma gajirã.

¹¹Masare igũ mahirire Goãmũ mari masare masicũ iituhajami. Mari masare eropa mahigũ áripehrerã peamegue wabonirãre Goãmũ turaro taudiãmi. ¹²⁻¹³Masare eropa mahigũ Goãmũ marire òpa doremi: Ñeri iirire, ñerire uaribejarire duhucãdoremi marire. Goãmũ turagũ, Jesucristo marire taugũ igũ òarire mari iaburinũre, igũ òaro mera dujariburinũre mari corerã iiaa. Eropigũ mari corerinũ mari corerisubu, mari pee masirã, òarire iiniguirã, Goãmũre umupeoniguirã marire áridoremi Goãmũ. ¹⁴Igũ Jesucristo mari ya áriburire ta sãrìdi árimi. Áripehrerã mari ñeri iirire duhucũ iibu, marire igũ yarã wacũ iibu sãrìdi árimi. Mari ñerire igũ eropa cóacũ mari ñerire iira dipuwaja marirã árirãca. Eropirã turaro òarire iidiarã árirãca.

¹⁵Ire áripehrerire iri nũgũro majarãre Jesu yarãre buheque mũhũ. Erã opu árigũ ta iiaa mũhũ. Eropigũ erãre wereque. Eropigũ erã ñerire iicũ ïagũ wereque erãre. Eropirã áripehrerã gajirã mũre cóadiabiricãporo.

Jesu yarã erã iiburire werenemopũ Pablo

3 ¹Òpa guñacũ iique ero majarã Jesu yarãre: Erã oparãre òaro yũhriã áriporo. Eropirã áripehrerire òari dihtare iirã áriporo. ²Eropirã gajirãre ne quere goroweobiricãporo. Game dũyasobiricãporo. Eropirã masa òarã, áripehrerãre umupeorã áriporo.

³Iribojegue mari sã pee masibirã, tarinũgarã, guyarire peenũrũrã, ñerire iisuarã, ñerire uaribeja duhumasibirã, mũmuri nũcu ñerire iiniguirã, gajirãre erã gajinore opacũ ïhaturirã árimũrĩribũ mari sã. Eropirã marire gajirã ïhaturimũrima. Eropirã mari sã erãre ïhaturimũrĩribũ. ⁴⁻⁵Eropa árinirã áriquerecũ ta Goãmũ marire peamegue wabonirãre taumi. Eropa taugũ igũ igũ òagũ áririre, masare igũ mahirire marire ïhmudi árimi. Òaro mari iira mera taubirimi marire. Marire mojomoro ïagũ mari ñeri iirare coegũ Espĩritu Santo mera marire taumi. Eropa ïigũ marire igũ porã wacũ iimi. Eropigũ Espĩritu Santopũ mari òarã áriburire marire gohrotomi. ⁶Jesucristo mari ñeri iira dipuwaja igũ sãri, masa mũriara mera Goãmũ igũ Espĩritu Santore omi marire wũaro igũ turarire mari opaboro dopa. ⁷Marire mahigũ, marire òaro iidiami. Eropigũ igũ, igũ Espĩritu Santore omi, ñeri iira dipuwaja marirã mari áriborore, mũmarogue mari eropa òaro árinigucãborore. Mari eropa áriniguiburire masirã irire mucubiri corerã iiaa mari.

⁸Iri yũ werera diaye ta ãhraa. Eropigũ irire yũ werediro dopa ta masare buhegu iri dorerire iipehodoreque mũhũ. Eropigũ Goãmũre umupeorãre irire buheque òarire erã òaro iiboro dopa. I yũ arĩ buhera òari buheri ãhraa. Eropirã masa i buherire erã peenũrucũ òaro itamuri áriroca erãre. ⁹Gajirã wereniguiripũ duhpiburi áribeaa. Erã masibiriquererã ta erã arĩ dũyasoma. Erã ñecũ sumarã arĩ bocarare game dũyasoma. Moise dorerire

arĩ d̄uyasoma. Erã eropa arĩ d̄uyasori iri árĩpehreri duhpiburi árĩbeaa. Eropigũ irire peenũrubicãque. Mũ sã d̄uyasobicãque.

¹⁰Mũa mera majagũ eropa game d̄uyasogu mũa basi game d̄uca wacũ ĩgu iicũ ĩagu “libiricãque,” arĩque ĩgũre. Yujusubu, pesubu irire ĩgũre mũ iidorebirira pũhrũ ĩgu yũhriricũ ĩagu ĩgũre wapicũ duhcãque. ¹¹Eropa d̄uyasogu ñeri dihtare uaribejaniguĩgu ãhrimi. Eropa ĩgu iicũ ĩarã ĩgu ñegũ árĩcũ masi, ĩgũre wapicũbircãro gahmea.

Pablo doretupũ

¹²Nicopoligue puhirópẽ árĩbu iiaa. Eropigũ Artemare o Tĩquicore mũ pohroque yũ obeomũhtacũ eroguere yũre bocatĩrigũ árĩque mũhũ. ¹³Eropigũ dorerire õaro mehregũre Zena waĩcũgũre, Apolo sãre õaro itamuque erã waborore. Eropigũ erã gamerire árĩpehrerire oque erãre dũhyaro mariro. ¹⁴Eropirã Jesu yarã mari mera majarã õarire iipoporo. Gajinore opapehobirãre erã itamuboro dopa, õarire iiniguirã erã árĩboro dopa eropa iipoporo.

Pablo õadorebeopũ Jesu yarãre

¹⁵Árĩpehrerã yũ mera majarã mũre õadorema. Ero árĩrã Jesu yarã guare mahirã õaporo. Árĩpehrerãre mũare Goãmũ ĩgu mahiri mera turaro õadorea. Eropa ta árĩniguicãporo. Iripẽta ãhraa.